

Inatsisissatut siunnersuut pillugu oqaaseqaatit

Oqaaseqaatit nalinginnaasut

1. Aallaqqaasiut:

Naartunermi, erninermi meeravissartaarnermilu sulinnigiffeqartarnek il.il. ullormusiaqartarnerlu pillugit Inatsisartut inatsisissaattut siunnersuutip matumani peqqussummi atuuttumi pingaarnertut tunngaviit ingerlateqqinneqarput. Aalajangersakkat pisariillisarneqarsimapput, oqaasertalersuinerlu erseqqinnerulluni. Peqqussummik allanngortiterineq taanna peqqussutip atuuttup qanoq paasineqarnissaanik apeqquteqarajuttarneq tunngavigalugu pisimavoq.

Manna tikillugu atuuttut pingaarnertut tunngaviusoq tassaavoq sulinnigiffeqarsinnaatitaanerup tamanut atuunera, ullormusiaqarsinnaatitaanerli isertitanik annaasaqarnermut ataneqartinneqarluni. Inuit pineqartut taakkuupput, tassalu akissarsiaqarlutik sulisartut, namminersorlutik inuussutissarsiortut, namminersorlutik inuussutissarsiortut katissimallugit aappaat inooqataalluunniit namminersorluni inuussutissarsiortumut ikiortaasut, ilinniartut atuartullu.

Piffissat sulinnigiffeqarfiusartut allanngortinneqarsimanngillat.

Inatsisissatut siunnersuummi matumani nutaartaasut tassaapput piffissamik sulinnigiffeqarfiusumik kipititsisarnek pillugu malittarisassat, nalunaarsorneqarlutik inooqatigiit sulinnigiffeqartarnerat ullormusiaqartarnerallu pillugit malittarisassat kiisalu meeravissartaartut aamma meeravissartaarnissaq siunertaralugu ilaqutariit meeqqanik paarsaqartut pillugit malittarisassat.

Nalunaarummi atuuttumi aalajangersakkat arlallit inatsisissatut siunnersuummi matumani ilanngunneqarsimapput, tassami taakku inatsimmiinnissaat naleqqunnerummat.

2. Siunnersuummi immikkortut pingaarnertit:

Piffissamik sulinnigiffeqarfiusumik kipititsineq

Piffissamik sulinnigiffeqarfiusumik kipititsineq pillugu malittarisassat eqaannerulersinneqarsimapput. Angajoqqaat sulinnigiffeqarnerminnik

kipititsinngikkaluarlutik taamalu sulinnigiffeqarnerup sinnera atorunnaarsinngikkaluarlugu ataatsimeersuarnernut, pikkorissarnernut, aalajangersimasunik sammisaqarluni ulluni aalajangersimasuni suliaqarnernut assigisaanullu suliamut attuumassuteqartunut peqataanissaminut inatsisissatut siunnersuutikkut periarfissaqalersinneqarput. Tamatuma pissuseqataa ilinniartunut atuuppoq, taakkumi siunnersuut tunngavigalugu atuartitsinermi annikinnerusumik peqataasinnaammata, piffissaq sulinnigiffeqarfiusoq kipitinngikkaluarlugu sulinnigiffeqarfissallu sinnera atorunnaarsinngikkaluarlugu. Allanguutip taassuma peqqussut ullutsinnut naleqqunnerusunngortippaa, angajoqqaallu periarfissaqalersillugit sammisani suliamut tunngasuni malinnaanissaannut, taamaalilluni piffissaq sulinnigiffeqarfiusoq pineqartoq sulinnigiffeqarfiumngitsoorsimasuuppat sulinnigiffeqartup suliffimmini qaffariartornernermigut ajornerusumik inissisimanissaa pisariaarullugu.

Nalunaarsugaasumik inooqatigiit

Inatsisissatut siunnersuut nalunaarsugaasumik inooqatigisap meeraanik meeravissartaarnermi meeravissartaartup meeqqap erniunerata kingornatigut sapaatit akunnerisa 15-it siulliit iluanni sapaatit akunnerini pingasuni erninnermut atatillugu sulinnigiffeqarsinnaatitaanera pillugu aalajangersakkamik imaqarpoq. Taamaattorli nalunaarsugaasumik inooqatigisap meeraanik meeravissartaarnissamik qinnuteqaat aamma anaanaasup meeravissartaarnissamik akuerinninnera kingosinnerpaamik meeqqap erniunerata nalaani tunniunneqareersimassapput.

Meeravissartaartut meeravissartaarnissarlu siunertaralugu ilaqutariit meeqqamik paarsaqartartut

Inatsisissatut siunnersuutikkut meeqqamik najugaqatiginngisaminnik meeravissartaartut meeqqap angajoqqaaviisut sulinnigiffeqarsinnaatitaalerlutillu ullormusiaqarsinnaatitaalerput. Meeravissartaartut meeqqamik meeqqanilluunniit Kalaallit Nunaanni aallernerminnut atatillugu sapaatip akunnerani ataatsimi sulinnigiffeqarsinnaatitaalerput, meearlu meeqqalluunniit Kalaallit Nunaata avataanut aaneqassappata sapaatit akunnerini pingasuni sulinnigiffeqarsinnaatitaalerlutik. Malittarisassat taakku meeravissartaartut meeqqap angajoqqaaviinut naligitillugit inissippaat, taamaalilluni piffissaq meeqqamik aallernermit atorneqartoq tullerinneri malillugit sapaatit akunnerinit 15-init aamma sapaatit akunnerinit 19-init tiguneqartussaajunnaarsillugu.

Peqqussummi atuuttumi sulinnigiffeqartitsisoqarsinnaanersoq taamaappallu qanoq sivistigusumik sulinnigiffeqartitsisoqassanersoq kommunit naliliisussaallutillu aalajangiisussaapput.

Taamaattorli oqaatigineqassaaq aalajangersakkat taamaallaat meeravissartaartunut imaluunniit meeravissartaarnissaq siunertaralugu angajoqqaarsiassatut meeqqamik ilisarimasareriigarinnngisaminnik tiguisusunut atuummata.

3. Pisortanut aningaasaqarnikkut aqutsinikkullu kingunerisassai:

Siunnersuut pisortanut aningaasaqarnikkut kinguneqassanngitsoq naliliisoqarpoq.

Siunnersuut aqutsinikkut pitsanngoriaataalaassasoq naliliisoqarpoq, tassami aalajangersagarpasuit erseqqinnerusunik oqaasertalersorneqarsimammata, matumani naatsorsuinerit pillugit aalajangersakkat ilanngullugit eqqarsaatigalugit.

4. Inuussutissarsiornermut il.il aningaasaqarnikkut aqutsinikkullu kingunerisassai:

Inatsisissatut siunnersuut inuussutissarsiornermut aningaasaqarnikkut aqutsinikkullu kinguneqassanngilaq.

5. Avatangiisinut pinngortitamullu kingunerisassai:

Siunnersuut avatangiisinut pinngortitamullu kinguneqassanngilaq.

6. Innuttaasunut aqutsinikkut kingunerisassai:

Siunnersuut innuttaasunut aqutsinikkut pitsanngoriaataalaassasoq naliliisoqarpoq, tassami aalajangersagarpasuit erseqqinnerusunik paasiuminarnerusunillu oqaasertalersorneqarsimammata.

7. Naalagaaffeqatigiinnermut Namminersornermullu tunngassuteqarnera:

Siunnersuut naalagaaffeqatigiinneq Namminersornerlu eqqarsaatigalugit sunniuteqassanngitsoq naliliisoqarpoq.

8. Oqartussaasunut, suliniaqatigiiffinnut allanullu tusarniaaneq:

Siunnersuut oqartussaasunut suliniaqatigiiffinnullu ukununnga tusarniaatigineqarsimavoq:

KANUKOKA, Naalakkersuisut Siulittaasuata Naalakkersuisoqarfia, Inuussutissarsiornermut Suliffeqarnermullu Naalakkersuisoqarfik, Aningaasaqarnermut Naalakkersuisoqarfik, Aalisarnermut Piniarnermut Nunalerinermullu Naalakkersuisoqarfik, Nunami namminermi pissutsinut Naalakkersuisoqarfik, Attaveqarnermut Avatangiisinullu Naalakkersuisoqarfik, Kultureqarnermut, Ilinniartitaanermut, Ilisimatusarnermut, Ilageeqarnermullu Naalakkersuisoqarfik, Peqqissutsimut Naalakkersuisoqarfik, Isumaginninnermi Naammagittaalliuuteqartarfik, Kommunit Kukkunersuisoqarfiat, Kalaallit Nunaanni Sulisitsisut Peqatigiiffiat, NUKUSA, AK, IK/ASG, Arkitektforbundet, IMAK,

NIISIP, PIP, PK, PPK, SIK, SSK, TP, AaNP, PANI, Attaveqaat, Ernisussiortuunerit Kattuffiat, Fysioterapeuterne i Grønland, Ergoterapeuterne i Grønland, Peqqissaanermut Ilinniarfik, Dansk Psykologforenings Grønlandskreds, I.I.P.S.I., Sorlak, Bedre Børneliv, ICC/ICYC, Foreningen for Enlige forsurgere, Katsorsaaviit, Tasiorta, Plejeforældreforeningen, NANU, Naligiissitaanissamat Siunnersuisoqatigiit, SQK, Nuummi Arnat Suleqatigiit, MIPI, Qaqiffik, Katsorsaavik, Plejeforældreforeningen, Handicapforening Puigornanga Forglemmigej, 8. marts gruppen, SPS, ISI / Ilimmarfik, Sulisartut Hujskoliat og Knud Rasmussenip Hujskolia.

Oqartussaqaarfiit kattuffiillu kinguliini taaneqartut tusarniaanermi akissuteqartut:

Tusarniaanermi akissutinut tiguneqartunut Naalakkersuisoqarfiup oqaaseqaatai naqinnernik uingasunik allataapput.

Tusarniaanermi akissutit:

KANUKOKA

KANUKOKA-p oqaatigaa, ferieqarnerup nalaani kommunini aqutsinermi naalakkersuinikkullu akisussaasut ferieqarnerisa nalaani tusarniaaneq isornartuusooq, tamatumalumi kingunerigaa kommunit marluinnaat tusarniaanermut qisuariaateqarsimanerat.

Oqaaseqatit tusaatissatut tiguneqarput. Manna ilanngunneqassaaq, inatisissatut siunnersuutip UKA 2009-mut ilanngunneqarnissaa kissaatigineqarsimagaluarmat. Siunnersuut tusarniaassutigalugu inatsisartunut qinersinerup 2. juni 2009-mi pisup kingorna aatsaat nassiussorneqarsinnaasimammat kinguneraa tusarniaanerup qaqutigoortumik pinertut aasaanerani ferieqarnerup nalaani pisariaqalersimamera.

KANUKOKA-P pitsaasumik pinertut isigaa aalajangersakkat pisariillisarneqarsimammata, oqaasiliornei ersarissut, sulinngiffeqartarnerup atorunnaarsittarnera pillugu aalajangersakkat eqqaannerusut. Meeravissiartaartut ilaqutariillu meeqqanik paarisqaartartut sulinngiffeqartarnermi periarfissaat eqqarsaatigalugit KANUKOKA isumaqarpoq allannguutit kommunit angingaasaqarnerannut suut kingunerissaneraat misissuiffigineqartariaqartut.

Erninermit atatillugu ullormusianut aningaasartuutit 90 %-ii Nunap Karsiata akilissavai 10 %-iilu kommunit akilissavaat. Aningaasatigut kingunerisassai annikitsuinnaassapput, pissutigalugu inatsisissatut siunnersuut malillugu sulinngiffeqartarneq pisinnaatitaaffinngortussaammat soorlu peqqussummi atuuttumi periarfissaasoq. Ulluinnarni pisaasiuvoq kommunalbestyrelsi peqqussut atuuttoq malillugu nalinginnaasumik sulinngiffeqartitisisarluni. Kiisalu meeravissiartaartut ilaqutariillu meeqqanik paarisqaartartut sulinngiffeqarnerminni

amerlanertigut isumaqatigiissutitigut pisinnaatitaaffeqartarput. Mannalu ilanngunneqarsinnaavoq aningaasatigut kingunerisassat annikitsut aningaasanut inatsimmi erninermut atatillugu ullormusiassanut aningaasartuutissatigut sinaakusiussat iluanniiissinnaammata.

§ 7, imm. 5-imut tunngatillugu oqaatigineqassaaq arnap sulisitsisup suliaq suliarisartakkaminit allaasoq neqeroorutigisaa tigumanngissinnaagaa, tassani pineqarpat suliaq arnap suliarisartagaanut naleqqiullugu annertuumik allaaneruppat qaffasissuseqarlunilu, tamatuma itisilerneqarnissaa erseqqissarneqarnissaalu pisariaqartinneqarmat.

§ 7, imm. 5-imut oqaaseqaatini assersuutinnguaq ataaseq ilanngunneqarsimavoq. Naartunermi, erninermi meeravissiartaarnermilu sulinnigiffeqartarnej il.il. ullormusiaqartarnerlu pillugit inatsiseqarnermut atatillugu ilitsersuummik suliaqarnermut tunngatillugu itisiliisoqassaaq erseqqissaateqartoqarlunilu assersuutit arlaqarnerusut atorlugit.

§ 11-mut tunngatillugu oqaatigineqarpoq, meeravissiartaartussat, meeqqamik kalaallimik meeravissiartaartussat, tassani nalinginnaavoq meeraq meeravissiartaartussanit ilisarimaneqareertarnera, taakkulu meeravissiartaartussat soorlu meeqqamik nunanit allaneersumik meeravissiartaartussanit ajornerusumik pineqartariaqanngitsut.

Tassunga tunngatillugu oqaatigineqassaaq, meeqqamik ilisarimariikkaminnik meeravissiartaartussat nalinginnaasumik meeraq tigummereertarmassuk meeravissiartaarinissaa sioqqullugu.

§ 12-imut tunngatillugu oqaatigineqassaaq, aalajangersagaq taanna § 11-mut naapertuutinngimmat, pisinnaatitaaffitsigut assigiinngitsitsisoqassanngimmat angut arnarlu inooqatigiippata imaluunniit angutaannaat inooqatigiippata.

Tassunga tunngatillugu oqaatigineqassaaq ilumut assigiinngitsitsisoqanngimmat, tassa inooqatigisatut nalunaarsugaq (angutaannaat/arnaannaat inooqatigiinneranni) katissimallugu aappaasumut katissimanagulu aappaasumut (arnap angutillu aappariinneranni) naligiissinneqarmat.

§ 38-mut tunngatillugu KANUKOKA isumaqarpoq, oqaasertaani ilannguttariaqartoq imaalillugu, pisortanit toqqakkatut sulinermi assigisaanilluunniit suliaqarluni akissarsiat ullormusianit ikinneruppata, ullormusianik taperneqarsinnaammata.

Oqaaseqaat tusaatissatut tiguneqarpoq tamannalu pillugu aalajangersagaq ilanngunneqarpoq.

Kommuneqarfik Sermersooq

Uparuarneqarpoq, Namminersorlutik Oqartussat atulernerisigut danskit inatsisaannut innersuussisarneq atorunnaassasoq.

Tamanna eqqortuuvoq innersuussinerlu piiarneqarpoq.

Siunnersuutip aningaasatigut kingunerisassaasa naatsorsorneqarnissaat kissaatigineqarpoq, tassani innersuussutigineqarluni soorlu meeravissartaartussanut ilaqutariinnullu meeqqanik paarisqaartartunut tunngatillugu sulinngiffeqartarnermi nutaanik sivitsukkanillu periarfissiisoqarnera.

KANUKOKA -mit oqaaseqaatit siuliini taaneqartut innersuussutigineqarput.

§ 7, imm. 3-mut tunngatillugu oqaatigineqarpoq eqqarsaataasariaqartoq nakorsap naliliineranut tunngatillugu nakorsap oqaaseqaatanik piumasaqartoqartariaqartoq, tamannalu aalajangersakkami allassimasariaqartoq tassunga oqaaseqaammik piumasaqarnermi akiliuteqartussaannermik aalajangersagaq ilanngullugu.

Tassunga tunngatillugu oqaatigineqassaaq nakorsap naliliineranut atatillugu uppersarsarsaasiineq nalinginnaasumik nakorsap oqaaseqaataatigut pisarpoq, tamannalu § 7, imm. 3-mut oqaaseqaatini ilanngunneqarpoq. Kommunalbestyrelsip nakorsap oqaaseqaataata pissarsiarinissaa kissaatigiguniuk taava nammineq akilissavaa. Ullutsinni suli periaaseq taanna atorpoq.

§ 23-mut tunngatillugu oqaatigineqarpoq, toqusoqartillugu napparsimaruluttoqartilluguluunniit erniinnaartumik paarlaasoqarnissaanik pisariaqartitsoqarsinnaasartoq, tak. § 16, taamaattumik sapaatit akunnnerinik 8-nit ikinnerusunik piffissaliisoqartariaqarpoq.

Oqaaseqaatit tusaatissatut tiguneqarput. § 23-mut ilanngunneqassaaq, pisarialimmik pisoqartillugu § 16 malillugu piffissaq sulinngiffeqarfissaq kingusinnerpaamik sapaatip akunneranik ataatsimik sioqqullugu sulisitsisumik ilisimatitsineq pissaaq.

§ 32-mut oqaaseqaatinut tunngatillugu oqaatigineqarpoq, allassimasariaqartoq siunnersuut imarisamigut nalunaarummi atuuttumi § 1, imm. 1-mut aamma § 2, imm. 1-mut naapertuuttariaqartoq.

Tamanna tusaatissatut tiguneqarpoq § 32-mullu oqaaseqaatinut ilanngunneqarluni.

§ 33, imm. 2-mut tunngatillugu eqqarsaatigisassatut – nalornisoortoqaqqunagu akerleriinnillu inerniliisoqaqqunagu - ilanngussassatut imaattoq siunnersuutigineqarpoq: ullormusiamnik naatsorsuinermi sapaatip akunneranut nal. akunneri atugassat amerlanerpaamik 40-sinnaapput.

Ilanngussassaq taanna ilitersuusiap saqqummersussap suliarineranut ilanngunneqassaaq.

§ 38-mut tunngatillugu oqaatigineqarpoq, iluaqutaasussatut isigineqartoq § 38-mut oqaaseqaatini oqaatsit atorneqartut pisortanit toqqagaasutut tamatumunngaluunniit assingusumik suliassaqartitaaneq itisilerneqarpata.

Aalajangersagaq allannguuteqartinneqarpoq, taamaalilluni “ tamatumunngaluunniit assingusumik” peerneqarluni.

Aningaasaqarnermut Naalakkersuisoqarfik

§ 7, imm.5-imut tunngatillugu AN-ip inassutigaa IN-ip isumaliutigissagaa oqaaseqatigiiliorerup “ suliaq arnap suliarisartagaanit annertuumik allaanerusoq imaluunniit manna tikillugu suliaanit allaasumik qaffasissuseqartoq pineqarpat....”

Oqaaseqaat tusaatissatut tiguneqarpoq aalajangersagarlu tassunga naleqqussarneqarpoq.

Kapitali 12-mut tunngatillugu AN isumaqarpoq aqqissuussineq qulliunerusumit isigalugu namminersortunut inooqatigalugillu ikiortigisaannut soqutiginaateqanngitsoq, piffissami sulinngiffeqarfiusumi sulinertik unitsittariaqassammassuk ullormusianik pisinnaajumallutik. Akerlianik ilinniagaqartut killeqartumik ingerlaannarsinnaallutik sulisartullu piffissap ilaannaanut sulinissamut akuerineqarsinnaallutik sulinerminnilu akissarsiaminnut ullormusianik tapiiffigineqarsinnaallutik. AN-ip inassutigaa taanna inatsisissatut siunnersuummut oqaaseqaatini paasinarsarlugu ersarissumik allanneqassasoq imaluunniit allanngortinneqassasoq, taamaalilluni tamarmik naligiissitaaniassammata.

Tassunga manna oqaatigineqassaaq, namminersortuuneq sulinermik inuussutissarsiuteqartuunermit ilinniartuunerminngaanniillu allaalluinnarmat. Innersuussutigineqarpoq inatsisissatut siunnersuummi § 1 aamma 3.

AN-ip oqaatigaa takuneq ajornakusoortoq aqqissuussineq angutaannaat arnaannaalluunniit inooqatigiit naartunermit, erninermit meeravissartaarnermullu atatillugu suliingiffeqarnermi ullormusiaqarsinnaanerannut periarfissiinersoq.

Tassunga tunngatillugu oqaatigineqassaaq, oqaaseq inooqatigisatut nalunaarsugaq angutaannarnut inooqatigiinnut arnaannarnulluunniit inooqatigiinnut tunngatinneqarmat, inatsisissatullu siunnersuummi aalajangersakkani taamaalillutik sulinggiffeqarneq ullormusiaqarnerlu periarfissinneqarlutik inatsisissatut siunnersuummi oqaatigineqartutut.

Kultureqarnermut, Ilinniartitaanermut Ilageeqarnermullu Naalakkersuisoqarfik

KIIN-ni isumaqarpoq sulinggiffeqartarnerup kipitittarnera pillugu malittarisassat siunnersuutigineqartut pitsaasuusut, taakkunuuna ilinniagaqarnerup, atorfeqarnikkut inissisimanerup ilaqutariinnermik aaqqissuussinnermut tunngatillugu nammineq aalajangiisinnaaneq annerusoq periarfissinneqarmat. Tamatuma saniatigut KIIN-ip inooqatigisatut nalunaarsukkamut tunngatillugu sulinggiffeqartarneq ullormusiaqarnerlu pillugit aalajangersagaqalerneru ilalernartippaa.

§ 8, imm. 2-mut tunngatillugu KIIN-ip oqaatigaa siunertamut naleqqutinngitsoq angut arnamik naartusumik inooqateqartoq, kisianni angut naartumut inatsisit naapertorlugit ataataanngitsoq sulinggiffeqarnissamut periarfissaqanngimmat. KIIN-ip oqaatigaa angutitt inooqatigisat meeqqamik isumaginnilluarnerusinnaasarmata inatsisit naapertorlugit ataataasinnaasumit immaqa meeqqamik attaveqanngitsuminngarnit. KIIN isumaqarportaaq ilalernartuusoq ataataasut inooqateqanngitsut erninnermut atatillugu sulinggiffeqarsinnaanerat.

Oqaatigineqassaaq, sulinggiffeqarsinnaattitaaneq angajoqqaajunermet tunngatinneqarmat.

§ 18, imm. 1 pillugu KIIN isumaqarpoq suliamut tunngasunut pikkorissarnernut isumasioqatigiinnernut il. il. peqataanissat sulinggiffeqartup nammineq suliniutigissagaa qulakkeerneqartariaqartoq kiisalu sulisitsisup sulisoq sulinggiffeqarnerata nalaani pikkorissarnissanut il.il. pinngitsaalisinnaassanngikkaa.

Oqaaseqaat tusaatissatut tiguneqarpoq aalajangersakkamullu oqaaseqaatinut ilanngunneqarluni.

§ 36.mut tunngatillugu KIIN-p oqaatigaa, KIIN-mit meeqqat atuarfianni atuartut annerit atuarnermut tapiiffigineqartarnerat pillugu Inatsisartut peqqussutaata nr. 5-ip, 28. oktober 1982-imeersup atorunnaarsinnissaa pillugu siunnersuuteqalersaartoq.

Oqaaseqaat taanna tusaatissatut tiguneqarpoq.

Peqqinnissamut Naalakkersuisoqarfik

Peqqinnissamut Naalakkersuisoqarfiup siunnersuutip pineqartup ilusilersugaanera iluarisimaarpaa, tassa naartunermi, erninermi meeravissiartaarnermilu sulingiffeqartarneq ullormusiaqartarnerlu pillugit aalajangersakkat innuttaasunit ajornangitsumik paasineqarsinnaasuliaammata. Tamatuma saniatigut naalakkersuisoqarfik allatigut uparuagassaqaanngilaq.

Kommunit kukkurersuisoqarfiat

Kapitali 3 pillugu. Inatsisissatut siunnersuummi § 8 aamma inatsisissatut siunnersuummi § 21 malunnarpoq imminut naapertuutinngitsut.

Oqaaseqaat tusaatissatut tiguneqarpoq imaattorlu siunnersuummut ilanngunneqassaaq, meeqqap inunngorneranit sapaatit akunneri 8 qaangiutsinnagit ilisimatitsineq pissaaq.

Kapitali 11 pillugu. § 31, imm. 2 pisariaqaanngitsutut isikkoqarpoq, pissutigalugu § 31, imm. 3-mi pineqartup inernissaa assigissammagu (tassalu sapaatip akunneranut nal. akunnerisa qassiunissaasa naatsorsorneri). Taakku aalajangersakkat marluk ataatsimut oqaasertaliuunneqarnissaat siunnersuutigaarput.

Sulisartunut sapaatip akunneranut nalunaaquttap akunnerinik aalajangersimasunik amerlassusilinnik sulisussaataasut sulilinninnerannilu siumut piffissaq suliffissaq aalajangerneqarsimanngikkaangat sapaatip akunneranut nalunaaquttap akunneri suliffiusut ullormusiaqaataasussat naatsorsorneri aalajangersakkani marlunni oqaatigineqarput, taamaalilluni naatsorsueriaaseq nalornisoorutaasinnaanani.

Kapitali 12 pillugu oqaatigineqassaaq, namminersortumik inuussutissarsiuteqartutut isigineqarnissamut piumasaqaatit/uppernarsaatit inatsisissatut siunnersuummi ilanngunneqaanngitsutut malunnarmata.

Oqaaseqaatit tusaatissatut tiguneqarput taamalu taaguutit namminersortumik inuussutissarsiuteqarneq, namminersortumut katissimallutu aappaasoq inooqataasorlu kiisalu namminersorluni inuussutissarsiortumut katissimanagu aappaasoq qanoq paasineqarnissaat naatsumik ersarissumik oqaasetalernerqarput § 32-mut oqaaseqaatini.

Kalaallit Nunaanni Sulisitsisut Peqatigiiffiat

GA inatsisissap ataatsimut allanneqarnissaa ilalernartippaa. GA-p aamma pissusissamisoortutut isigaa meeravissiartaartut angajoqqaallu akuerineqarlutik meeqqanik meeravissiartaarisnissaat siunertaralugu paarisaqartartut

meeravissiarternut atatillugu sulinnigiffeqarsinnaatitaanissaat ullormusiaqartitaanissaallu.

GA-p iluaqutaasussatut isiginngilaa aammalu Naalackersuisut pisinnaasatigut ineriartortitsinermik anguniagaqarneq pillugu politikkerisaannut naapertuuttutut isiginagu, ilinniagaqartut soraarummeersinneqarsinnaanatilluunniit ilinniakkamik ilaanik ingerlatseqqissinnaanngippata. Ilinniagaqartut sulinnigiffeqarsinnaatitaallutillu ilinniagaqarnermikkil nangitsisinnaatitaasariaqarput imaluunniit ataasiakkaatigut soraarummeeruteqarsinnaallutilluunniit ilinniakkamik ilaanik naammassinnissinnaasariaqarput. GA-p oqaatigaa ullormusiaagaluarpata ilinniarnersiuataagaluarpataluunniit Nunatta Karsianit akilerneqartussaasut. Imaattariaqarporli piffissami sulinnigiffeqarfiusumi ullormusiaqartariaqartut, pissutigalugu tamatuma kingunerissanngimmagu ilinniagaqartut sulinnigiffeqarnermikki ilinniarnersiutiminnik ikilisaaffigineqarnissaat. Pisariaqartitsineq pingaartumik ilinniagaqarnerni pinngitsoorani ilinniartitsinernut najuttussaaffiusuni. GA-p unitsitsinissamik aalajangersagaq ilinniagaqartut ilinniakkaminnik naammassinninnissaminnut periarfissaannik killiliinerinnartut isigaa. GA-p naliliinera tunngavigalugu aalajangersakkap allanngortinnissaa ajortumik kingunissaqanngilaq, taamaalillutik ilinniagaqartut ilinniarnermik ilaanik ingerlatsisinnaanerminnut periarfissaqassammata, tassani GA-p oqaatigigaa, taamaaliorneq ilinniartumut inuiaqatigiillu ataatsimut isigalugit iluaqutaaginnartussaasoq.

Oqaaseqaatit tusaatissatut tiguneqarput.

IMAK

IMAK-ip oqaatigaa, ilalernartoq atuisunullu pitsaasuussasoq peqqussut atuuttoq kingusinnerusukkut allannguuteqartinneqartoq imaalillugu allanneqarpat paasisutissat tamarmik tassani ataatsimi nassaassaalerlutik. Taamatuttaaq IMAK-ip taperserpaa, nalunaarsorsimallutik aappaasut katissimallutik aappariinnut inooqatigiittunullu naligiissinneqarnissaat, taamatuttaaq meeravissiarternut meeqqap angajoqqaaviinut naligissitaanissaat.

§ 18-mut aamma 19-mut tunngatillugu IMAK isumaqarpoq aalajangersakkat suli paasiuminaatsut. Soorlu assersuutigalugu sapaatip akunneranik sivisussusilimmik marloriarluni pikkorissartitsisarfirmiilluni pikkorissarnernut ilinniarnermut sivisuumut atasumut peqataasoqarsinnaanersoq, tassani peqataanngitsoorneq ilinniarniviup sivitsorneqarneranik kinguneqartussaalluni? IMAK isumaqarpoq oqaatsip “sivikitsoq” qanoq paasineqarnissaa pillugu naatsumik ersarissumik nassuiaasertariaqartoq.

Oqaaseqaatit tusaatissatut tiguneqarput. Ilitsersuummut suliarineqartumut atatillugu itisiliisoqassaaq ersarissaasoqarlunilu kiisalu assersuutinik ilanngussisoqassaaq.

SIK

SIK-p inatsisissatut siunnersuut naammagisimaarpaa, oqaatigaluguli inatsisissatut siunnersuutip kalaallit oqaasiinut nutserneqarnera suli atuaruminaallunilu paasiuminaassinnaasoq.

Oqaaseqaat tusaatissatut tiguneqarpoq.

Taggisit “Katissimallugu aappaq, nalunaasugaasumik inooqatigisaq aamma inooqatigisaq,” inatsisissatut siunnersuummi eqqortumik atorneqarnissaat siunnersuutigineqarpoq.

Tusaatissatut tiguneqarpoq.

§ 3, imm. 3-mut kapitali 12-mullu tunngatillugu siunnersuutigineqarpoq, aalajangersagaq ukununnga atuutissasoq”.....katissimallugit aappaat, nalunaasugaasumik inooqatigisaat inooqataalluunniit ikiortaasut.....”

Tusaatissatut tiguneqarpoq.

§ 8-mut tunngatillugu siunnersuutigineqarpoq imatut allassimassasoq “Ataataasoq imaluunniit nalunaasugaasumik inooqatigisaq....”

Tusaatissatut tiguneqarpoq.

§ 2, imm. 2-mut tunngatillugu siunnersuutigineqarpoq aalajangersakkami tassani suna pineqarnerasoq ersarinnerusumik allassimanissaa taassumalu malitsigisaanik § 17-imi aalajangersakkap kingunerisassaata naqqiiviginissaa, pissutigalugu inatsisissatut siunnersuutikkut siunertaammat meeqqat ilaasa marlunnik anaanaqarlutik marlunnillu ataataqarlutik angerlarsimaffeqarnissaasa pingaartutut isigineqarnissaat.

§ 2, imm. 2 imaluunniit § 17 malillugit arnaannaat angutaannaalluunniit aappariit aalajangersakkani aamma pineqarnerasut erseqissaavigineqarnissaat imaluunniit immikkuullarissumik isiginiarneqarnissaat pisariaqartinneqanngilaq, pissutigalugu § 2, imm. 2-mi pineqarmata inuit meeqqamik meeravissiartaarnissaq siunertaralugu paarisassamik tigusaqartut sulinngiffeqarnissamut pisinnaatitaasut, § 17-milu pineqarlutik angajoqqaat, angajoqqaarsiat, ataatat nalunaasugaasumillu inooqatigisat.

Kapitali 5-mut tunngatillugu SIK isumaqarpoq aalajangersakkanik

sukaterisoqartariaqartoq, taamaalilluni meeqqanik piffissaq sivisooq atorlugu paarisqaqartariaqartartut sulinnigiffeqarnissamut periarfissaqartitaanerat pisinnaatitaaffinngorlugu.

Isuma tusaatissatut tiguneqarpoq.

Angajoqaarsiaasartut Peqatigiiffiat

Angajoqaarsiaasartut Peqatigiiffiata inatsisissatut siunnersuut nuannaarutigalugu oqaatigaa, tassani meeqqat meerarsiaasartut salliutinneqarmata, ilanngulluguli oqaatigalugu kapitali 5-imi aalajangersakkt oqaasiliorneri paasiuminaatsuusut.

Tassunga atatillugu oqatigineqassaaq § 14, imm. 5 malillugu Naalackersuisut meeqqamik meerarsianngortitsinermut atatillugu sulinnigiffeqarnissamut akuersissuteqarnissaq pillugu ersarinnerusunik aalajangersagaliorsinnaammata.

Angajoqaarsiaasartut Peqatigiiffiata ajornartorsiuteqartitsisinnaasutut isigaa inatsisissatut siunnersuummi angajoqqaat meeqqamik paarisassaminnik tigusinerminnut atatillugu sulinnigiffeqarsinnaatitaasutut ullormusiaqartitaasinnaasutullu ersarissumik oqaatigineqanngimmata.

Angajoqaarsiaasartut Peqatigiiffiata ilanngullugu oqaatigaa akulikitsumik meeqqat meerarsinngortartut tassaasamata meeqqat annertuunik ajornartorsiutillit. PLF Nuup taamaattumik inassutigerusuppa inatsisissatut siunnersuummi angajoqqaat meeqqanik paarisqaqartartut akuerisaasut apeqqutaatinnagu meeravissiartaarnissaq siunertaanersoq siunertaannginnorsorluunniit tamarmik pineqarnissat siunnersuutigalugulu § 14 imatut oqaasertalerneqassasoq: Meeraq pingasut inorlugit ukiulik meeqqanik inuusuttunillu ikiorsiisarneq pillugu Inatsisartut peqqussutaat tunngavigalugu ilaqutariinnit paarisassanngorlugu inissinneqarpat angajoqaarsiat aappariit arlaat meeqqap tigusineranut atatillugu sulinnigiffeqarnissamut akuerineqassasoq. Sulinnigiffeqarneq sapaatit akunnerinik 8-nik sivissuseqassaaq. Imm. 2. Meeraq pingasut aqqaneq marlullu akornanni ukioqarpat sulinnigiffeqarneq sapaatit akunnerinik sisamanik sivissuseqassaaq. Imm. 5. Naalackersuisut meeqqamik paarineqartussamik inissiinermut atatillugu sulinnigiffeqarnissamut akuersisarneq pillugu ersarinnerusunik aalajangersagaliussapput.

Tassunga atatillugu oqatigineqassaaq inatsisissatut siunnersuummi angajoqqaat meeqqamik paarisqaqartussat tamarmik sulinnigiffeqarnissamut pisinnaatitaanissat siunertaangimmat, taamaallaat meeqqamik meeravissiartaarnissaq siunertaralugu paarisassamik inissiinermut atatillugu. Tamatumunnga peqatigitillugu periarfissamik ammaassusisoqarpoq, tassa angajoqqaat meeqqamik paarisqaqartussat arlaata sulinnigiffeqarnissaanut akuersisoqarsinnaasooq, meeqqamik paarisassamik inissiineq ukiumik ataatsimik sivisunerusunilluunniit sivissuseqassappat.

Oqartussa qarfiit kattuffiillu kinguliini taaneqartut oqaaseqaateqanngillat:

Nunami namminermi Pissutsinut Naalakkersuisoqarfik, Peqqissutsimut Naalakkersuisoqarfik/PAARISA, Isumaginninnermi Naammagittaalliuteqartarfik, Inuussutissarsiornermut Suliffeqarnermullu Naalakkersuisoqarfik, Peqqissaanermik Ilinniarfik, AK, SSK, TP, AaNP, PANI, Ernisussiortuunerit Kattuffiat, Fysioterapeuterne i Grønland, Ergoterapeuterne i Grønland, Dansk Psykologforenings Grønlandskreds, I.I.P.S.I., Sorlak, Bedre Børneliv, ICC/ICYC, Foreningen for Enlige Forsørgere, Katsorsaaviit, Tasiorta, NANU, Naligiissitaanissamat Siunnersuisoqatigiit, Krisecentersammenslutningen, Nuummi Arnat Suleqatigiit, MIPI, Qaqiffik, Katsorsaavik, NIISIP, PIP, PK, PPK, NUKUSA, IK/ASG.

Oqartussa qarfiit kattuffiillu kinguliini taaneqartut tusarniaanermi akissuteqanngillat:

Arkitektforbundet, Attaveqaat, Naalakkersuisut Siulittaasuata Naalakkersuisoqarfia, Piniarnermut, Aalisarnermut Nunalerinermullu Naalakkersuisoqarfik, Ineqarnermut, Attaveqarnermut Angallanermullu Naalakkersuisoqarfik, Handicapforeningen Puiornanga Forglemmigej, 8. marts gruppen, SPS, ISI / Ilimmarfik, Sulisartut Hujskoliat, Knud Rasmussenip Hujskolia.

Aalajangersakkat ataasiakkaat pillugit oqaaseqaatit

§ 1 pillugu

Aalajangersagaq taanna nutaajuvoq, peqqussutillu siunertaa taaneqarluni. Tulleriinneri malillugit sulingiffeqarsinnaatitaanerup ullormusiaqarsinnaatitaanerullu imminnut ataqatigiinneqarnissaat pisariaqanngitsoq aalajangersakkakut tassuuna erseqqissarneqarpoq.

§ 2 pillugu

Imm. 1 pillugu.

Aalajangersakkap taassuma peqqussummi atuuttumi § 1, imm. 1 assigaa. Taamaattorli peqqussummi aalajangersakkat sinnerinut innersuussineq ilanngunneqarsimangilaq.

Aalajangersakkakut tassuuna erseqqissarneqarpoq inuit pineqartut sulinnigiffeqarsinnaatitaassagunik Kalaallit Nunaanni aalajangersimasunik najugaqartuussasut Kalaallit Nunaanni inunnik nalunaarsuiffimmi nalunaarsorsimasussaasut.

Imm. 2 pillugu.

Aalajangersakkap taassuma peqqussummi atuuttumi § 1, imm. 2 assigaa. Taamaattorli peqqussummi aalajangersakkat sinnerinut innersuussineq ilanngunneqarsimanngilaq.

Aalajangersakkakut tassuuna erseqqissarneqarpoq inuit Kalaallit Nunaanni aalajangersimasumik najugaqartut Kalaallillu Nunaanni inunnik nalunaarsuiffimmi nalunaarsorsimasut meeravissiartaarnissaq siunertaralugu meeqqamik paarsassamik tigusinermut atatillugu sulinnigiffeqarnissaat akuersissutigineqarsinnaasoq. Taamaattorli peqqussummi aalajangersakkat sinnerinut innersuussineq ilanngunneqarsimanngilaq.

Imm. 3 pillugu.

Aalajangersagaq taanna nutaajuvoq, imarisamigulli peqqussummi atuuttumi § 1, imm. 4-mi tunngavissaq assigalugu. Aalajangersakkakut tassuuna erseqqissarneqarpoq sulinnigiffeqarsinnaatitaaneq ullormusiaqarsinnaatitaanerlu aamma inunnut Nunat Avannarliit Isumaginninnermi Isumannaallisaaneq pillugu Isumqatigiissutaanni imaluunnit nunat tamat isumaqatigiissutaanni Kalaallit Nunaannut aamma atuuttuni pineqartunut atuuttoq.

§ 3 pillugu

Aalajangersagaq nutaajuvoq, inuillu suliffeqarnermut attuumassuteqartut piffissami sulinnigiffeqarfiusumi ullormusiaqarsinnaatitaasut erseqqissarlugit, kiisalu ilinniartut atuartullu ullormusiaqarsinnaatitaanerat erseqqissarlugu.

§ 4 pillugu

Aalajangersagaq taanna peqqussummi atuuttumi § 2-p assigaa.

Aalajangersakkakut tassuuna erseqqissarneqarpoq piffissami sulinnigiffeqarfiusumi sulinnigiffeqarsinnaatitaaneq ullormusiaqarsinnaatitaanerlu pillugit peqqussummi aalajangersakkat akissarsiaqarluni sulisartumut ajorseriaataasumik isumaqatigiissutitigut saneqqunneqarsinnaanngitsut. Aalajangersagaq taanna akissarsiaqarluni sulisartup sulisitsisoq eqqarsaatigalugu isumannaallisaffigineqarneranut peqataavoq. Aalajangersagaq isumaqarpoq akissarsiaqarluni sulisartuq piffissap sulinnigiffeqarfiusup naannginnerani

sulileqqinniarluni aalajangersinnaasoq, tassami pisuni taamaattuni tamanna akissarsiaqarluni sulisartup kissaatigisaa tunngavigalugu pisussaammat, taamaattumillu pineqartumut iluaqusiisutut isigisariaqarluni.

§ 5 pillugu

Aalajangersakkap taassuma peqqussummi atuuttumi § 3 assigaa, piffissarlu suliffimmi suliffiusimasoq piffissamik sulinngiffeqarfiusussamik naatsorsuinermi ilanngunneqartassasoq erseqqissarlugu.

§ 6 pillugu

Imm. 1 pillugu

Aalajangersakkap taassuma peqqussummi atuuttumi § 4, imm. 1 assigaa. Aalajangersakkakkut tassuuna erseqqissarneqarpoq akissarsiaqarluni sulisartoq naartunini imaluunniit erninermut atatillugu sulinngiffeqarnini imaluunniit inatsit manna naapertorlugu sulinngiffeqarumalluni kissaateqarnermik saqqummiussisimanini pissutigalugu soraarsinneqarsinnaanngitsoq.

Imm. 2 pillugu

Aalajangersakkap taassuma peqqussummi atuuttumi § 4, imm. 2 assigaa. Aalajangersakkakkut tassuuna erseqqissarneqarpoq sulisitsisoq tassaasoq soraarsitsisoqarsimappat soraartitsinerup naartunermik pissuteqannginneranik uppernarsaasiisussa.

Imm. 3 pillugu

Aalajangersakkap taassuma peqqussummi atuuttumi § 4, imm 3 assigaa. Aalajangersakkakkut tassuuna erseqqissarneqarpoq akissarsiaqarluni sulisartoq § 4, imm. 1 unioqqutillugu soraarsinneqarpat sulisitsisup taarsiissutit akilissagai, taakkulu piffissami akissarsiaqarluni sulisartup sivisunerpaamik sulinngiffeqarsinnaatitaanerani atorffimmi soraarsitsiviusumi akissarsianit ikinnerussanngitsut.

§ 7 pillugu

Imm. 1 pillugu

Aalajangersakkap imarisaa peqqussummi atuuttumi § 9, imm. 1 assigaa, arnallu naartunermut erninermullu atatillugu sulinngiffeqarsinnaatitaaneranut tunngasuulluni.

Arnat tamarmik naartunermit erninerullu atatillugu sulinngiffeqarsinnaatitaapput, aamma erniffissatut naatsorsuutigisaaq sioqqullugu sapaatit akunnerini 13-ini kingullerni suliffeqarnermut attuumassuteqarsimanngikkaluarunilluunniit. Piffissap sulinngiffeqarfiusup sivisussusia suli tassaavoq erniffissatut naatsorsuutigisaaq sioqqullugu sapaatit akunneri marluk erninerullu kingornatigut sapaatit akunneri 15-it.

Imm. 2 pillugu

Aalajangersakkap imarisaa peqqussummi atuuttumi § 9, imm 2 assigaa, arnallu marlulinermini amerlanerusunilluunniit ataatsikkut meerartaarnermini sulinngiffeqarsinnaatitaaneranut tunngasuulluni. Piffissap sulinngiffeqarfiusup sivisussusia malittarisassat atuuttut eqqarsaatigalugit allannguteqarani erniffissatut naatsorsuutigineqartoq sioqqullugu sapaatit akunnerinik marlunnik erninerullu kingornatigut sapaatit akunnerinik 19-inik sivisussuseqarluni.

Imm. 3 pillugu

Aalajangersakkap taassuma peqqussummi atuuttumi § 10, imm. 1 assigaa, naartunerlu peqqissup naartuneranit allaappat erniffissaaq sioqqullugu sapaatit akunnerini marlunni sulinngiffeqarsinnaatitaanermit tunngasuulluni. Taamaattorli nakorsaaq tamanna pillugu naliliisinneqartussaavoq, nalinginnaasumillu taamaaliornissaaq pissaaq nakorsap uppersaataatigut.

Imm. 4 pillugu

Aalajangersakkap taassuma peqqussummi atuuttumi § 10, imm. 2 assigaa, erniffissarlu sioqqullugu sapaatit akunnerini marlunni sulinngissinnaatitaanermit tunngasuullunni, suliap pissusia naartumik ulorianartorsiorfitsippat, imaluunniit arnap suliainik ingerlatsinera pisortat aalajangersagaasa akornuserpassuk, sulisitsisorlu suliffimmik naleqquttumik allamik neqeroorutissaqanngippat.

Imm. 5 pillugu

Aalajangersagaq taanna peqqussummi nutaajuvoq, imarisamigulli nalunaarummi atuuttumi § 5, imm. 1 assigalugu. Aalajangersagaq sulisitsisup suliffimmik naleqquttumik allamik neqeroorutaanik arnap tigusiumanngissinnaatitaaneranut tunngasuuvuq.

Aalajangersakkakkut tassuuna erseqqissarneqarpoq sulisitsisup suliffimmik allamik neqeroorutaa arnap tigusiumanngissinnaagaa, suliaq manna tikillugu sularisartagaanit annertuumik allaassuteqarpat imaluunniit qaffasissuseq annertuumik allaassuteqartoq pineqarpat, suliffillu alla nuunnermik imaluunniit suliartornermut suliffimmillu angerlarnermut atatillugu angallannikkut ajornartorsiorfiusoq imalluunniit ullup

unnuallu ingerlaneranni piffissaq suliffiuseq alla pineqarpata. Malittarisassat taakku ilanngunneqarput arnaq naartusoq naartualu illersorniarlugit.

Suliaq manna tikillugu suliarisartagaanut naleqqiullugu qaffasissuseq annertuumik aallaassuteqartoq pineqarpat, tassani sulisorisat ulluinnarni aqutsinermik suliaqartoq suliamik allamik aqutsinertaqanngitsumik neqeroorfigineqartoq assersuutigineqarsinnaavoq.

Oqaatigineqassaaq malittarisassat taakku sulisitsisup malinngippagit aalajangiineq taamaattoq isumaginnittoqarfiup aqunneqarnera aqqissuussaaneralu pillugit malittarisassat naapertorlugit naammagittaalliutigineqarsinnaanngitsaq, tassaallunili pineqartup kattuffia aqqutigalugu eqqartuussivinnut suliaassanngortinneqartussa.

Imm. 6 pillugu

Aalajangersagaq taanna peqqussummi nutaajuvoq, nalunaarummili attuuttumi § 5 imm. 2 assigalugu. Suliffimmik naleqquttumik allamik nassaartoqarsinnaanngippat arnap piffissap ilaannaani sulinngiffeqarsinnaatitaanera aalajangersakkakut tassuuna erseqqissarneqarpoq.

§ 8 pillugu

Imm. 1 pillugu

Aalajangersakkap taassuma peqqussummi atuuttumi § 9, imm. 3 imarisamigut assigaa, taamaattorli ataataasup sulinngiffeqarsinnaatitaanerani suliffeqarnermut attuumassuteqarnissaa, ilinniartuunissaa atuartuunissaaluunniit piumasaataanani, naak tamanna peqqussummi § 9, imm. 3-mi atuuttumi aalajangersarneqarsimagaluartoq.

Erninerup kingornatigut sapaatit akunerisa 15-it aamma 19-it iluanni sapaatit akunnerini pingasuni sulinngiffeqarsinnaatitaaneq ataataasunut tamanut atuuppoq, ullormusiaqarsinnaatitaasoqarsinnaanera apeqqutaatinnagu.

Imm. 2 pillugu

Aalajangersagaq taanna nutaajuvoq, imarisamigulli tassaalluni aalajangersagaq ataataasup meeqqat inatsiseqartitsinikkut inissisimanerat pillugu inatsit Naapertorlugu inatsisilerinikkut ataataasutut paasineqarnissaanik erseqqissaasuusoq, peqqussummi atuuttumi § 9, imm. 3-mi imaritinneqartut.

Inatsisilerinikkut ataataq tassaatinneqarpoq angut meeqqap anaanaata katissimasaa, taamaattumillu meeqqat inatsiseqartitsinikkut inissisimanerat pillugu inatsit naapertorlugu meeqqap ataataatut isigineqartussa, tassaallunilu angut meeqqamut ataataasussatut eqqartuunneqarsimasooq imaluunniit ataataasarsiuinermi ataataasutut

isigineqarnerminik akuerinnissimasoq. Angut naartusumut katissimasoq naartusumilluunniit inooqateqartoq katissimalluni aappariinneq inooqatigiinnerluunniit pissutiginnarnagu inatsit manna tunngavigalugu sulinnigffeqarsinnaatitaasoq.

Ataataasup anaanaasumik meeqqanillu inooqateqartuunissaa piumasqaataangilaq.

§ 9 pillugu

Aalajangersagaq taanna peqqussummi atuuttumi § 9, imm. 4-nik annertusisitsisuuvoq, taamaalilluni aalajangersakkami meeravissiassanngortitsinerup, meeqqamik paarsassanngortitsilluni inissiinerup imaluunniit meeqqap toqunerata saniatigut meeqqap toqungalluni erniunera aamma ilanngunneqarluni. Aalajangersakkami aammattaaq pineqarput meeqqanik inuusuttunillu ikiorsiisarneq pillugu Inatsisartut peqqussutaat naaportorlugu angerlarsimaffiup avataanut inissiinerit tamarmik, meeqqap paarsassatut inissinneqarnerata saniatigut ulloq unnuarlu paaqqinniffimmut inissinneqarsinnaanera sillimmaanniarlugu.

Meeqqap toqunerani sulinnigffeqarsinnaatitaaneq eqqarsaatigalugu aalajangersakkakkut tassuuna erseqqissarneqarpoq tamanna meeqqap erniunerata kingornatigut tulleriinneri malillugit sapaatit akunnerisa 15-it 19-illu iluanni toqusoqarnerani atuuttoq.

§ 10 pillugu

Imm. 1 pillugu

Aalajangersagaq taanna nutaajuvoq. Aalajangersakkakkut tassuuna erseqqissarneqarpoq meeravissiartaartut meeqqamik Kalaallit Nunaanni tigusisut meeqqamik tigusineq sioqqullugu sapaatip akunnerani ataatsimi sulinnigissinnaatitaasut. Meeravissiartaartut meeqqap sumiiffigisaanniinnissaat piumasqaataavoq.

Aalajangersagaq taanna taamaallaat meeravissiartaartunut imaluunniit ilaqutariinnut meeravissiartaarnissaq siunertaralugu meeqqamik paarsaqarnissaminnut akuerisaasunut, meeqqamik ilisarimasareeriinngisaminnik tigususunut atuuppoq.

Aalajangersagaq taanna meeravissiartaartunik meeqqallu angajoqqaaviinik naligiissitsineruvoq, taamaalilluni piffissaq meeqqamik aallernermut atorneqartoq tulleriinneri malillugit sapaatit akunnerinit 15-init 19-inillu taakkunanga ilanngaatigineqartariaarullugu.

Imm. 2 pillugu

Aalajangersagaq taanna nutaajuvoq. Aalajangersakkakut tassuuna erseqqissarneqarpoq meeravissartaartut meeqqamik Kalaallit Nunaata avataanit aallersut meeqqap tiguneqarnissaa sioqqullugu sapaatit akunnerini pingasuni sulinngissinnaatitaasut. Taamaalilluni piffissami sulinngiffiusumi meeqqamik Kalaallit Nunaata avataani aallernerup piffissamik atuiffiusariaqarnera sillimmaanneqarsimavoq.

Meeraq nassarlugu angerlarnissamut pisortatigut piumasagaataasut eqqortinneqarpata meeraq tiguneqarsimasutut isigineqalersarpoq.

Aalajangersagaq taanna tunngavigalugu sulinngittoqassappat piumasagaataavoq meeravissartaarneq suliniaqatigiiffimmit akuerisaasumit aaqqissuunneqarsimasoq imaluunniit ilaqutariinnik kattutsitsineq pineqassasoq.

Imm. 3 pillugu

Aalajangersagaq taanna nutaajuvoq. Aalajangersagaq taanna meeravissartaartunik meeqqallu angajoqqaaviinik naligiisitsineruvoq, piffissap sulinngiffeqarfiusup sivisussusia kiisalu sulinngiffeqarnerup meeravissartaartut akornanni agguataarneqarnera eqqarsaatigalugit.

Imm. 4 pillugu

Aalajangersagaq taanna nutaajuvoq. Aalajangersakkakut tassuuna erseqqissarneqarpoq meeravissartaartut meeqqamik marlunnik amerlanerusunilluunniit aallersut sapaatit akunnerini 19-ini sulinngiffeqarsinnaatitaasut, sapaatillu akunnerisa 19-it taakkua iluanni sapaatit akunnerini pingasuni ataatsikkut sulinngiffeqarsinnaatitaasut. Sapaatit akunneri sinneruttut meeravissartaartunit ataasiakkaarluni taamaallaat atorneqarsinnaapput.

Aalajangersagaq taanna meeqqamik marlunnik amerlanerusunilluunniit ataatsikkut erniusunik meeravissartaartunik meeqqallu angajoqqaaviinik naligiisitsineruvoq, piffissap sulinngiffeqarfiusup sivisussusia kiisalu sulinngiffeqarnerup meeravissartaartut akornanni agguataarneqarnera eqqarsaatigalugit.

Kapitali

§ 11 pillugu

Imm. 1 pillugu

Aalajangersagaq taanna nutaajuvoq, § 10-llu taamaallaat meeravissartaartunut meeqqamik ilisarimasareeriinngisaminnik tigusisunut atuunnera erseqqissarlugu.

Imm. 2 pillugu

Aalajangersagaq taanna nutaajuvoq, § 10-lu taamaallaat inunntut meeravissiarthaarsinnaasutut akuerisaasunut imaluunniit meeravissiarthaarnissaq siunertaralugu meeqqamik paarsaqartussatut akuerisaasunut atuunnera erseqqissarlugu.

§ 12 pillugu

Imm. 1 pillugu

Aalajangersagaq taanna nutaajuvoq, erseqqissarlugulu nalunaarsugaasumik inooqatigisap meeraanik meeravissiarthaarnermi meeravissiarthaartoq meeqqap erniunerata kingornatigut sapaatit akunerisa 15-it siulliit iluanni sapaatit akunnerini pingasuni erninermut atatillugu sulinngiffeqarsinnaatitaasoq. Aalajangersakkap taassuma ataataasup tulleriinneri malillugit sapaatit akunnerisa siulliit 15-it imaluunniit 19-it iluanni sapaatit akunnerini pingasuni sulinngiffeqarsinnaatitaanera pillugu aalajangersagaq assigaa.

Imm. 2 pillugu

Aalajangersagaq taanna nutaajuvoq, erseqqissarlugulu nalunaarsugaasumik inooqatigisap meeraanik meeravissiarthaarnissamik qinnuteqaat anaanaasullu meeravissiarthaarnissamut akuersissutaa kingusinnerpaamik erniffik nalerorlugu tunniunneqarsimassasut.

§ 13 pillugu

Aalajangersagaq taanna nutaajuvoq erseqqissarlugulu meeraq toqungalluni erniuppat imaluunniit erniunermi kingornatigut sapaatit akunnerisa 15-it imaluunniit 19-it siulliit iluanni toquppat, meeravissiasannngortinneqarpat, meeqqanik inuusuttunillu ikiorsiisarneq pillugu Inatsisartut peqqussutaat naapertorlugu angerlarsimaffiup avataanut inissinneqarpat erninermut atatillugu sulinngiffeqarneq atorunnaassanngitsoq.

Aalajangersagaq taanna ilanngunneqarpoq nalunaarsugaasumik inooqatigiinnermi inooqataasup arnat angutillu inooqatigiinneranni pisarnertut ataataasutut pisinnaatitaaffeqarnissaa qulakkeerniarlugu.

§ 14 pillugu

Imm. 1 pillugu

Aalajangersagaq taanna nutaajuvoq, erseqqissarlugulu meeraq pingasut inorlugit ukiulik meeqqanik inuusuttunillu ikiorsiisarneq pillugu Inatsisartut peqqussutaat naapertorlugu ilaqutariinnut paarsassanngortillugu inissinneqarpat kommunalbestyrelsi aalajangiisinnaasoq angajoqqaarsiat arlaat meeqqap tiguneqarneranut atatillugu sulinngiffeqassasoq. Sulinngiffeqarneq taanna sapaatit akunneri tallimat tikillugit sivisussuseqarsinnaavoq.

Aalajangersagaq taanna ilanngunneqarpoq meeqqap angajoqqaarsiallu akoranni toqqissisimalernissamat piffissaqarnissaq qulakkeerniarlugu.

Imm. 2 pillugu

Aalajangersagaq taanna nutaajuvoq, erseqqissarlugulu meeraq pingasut 12-illu akornanni ukioqarpat sulinngiffeqarneq sapaatit akunneri marluk tikillugit sivisussuseqarsinnaasoq.

Imm. 3 pillugu

Aalajangersagaq taanna nutaajuvoq, erseqqissarlugulu imm. 1 imaluunniit 2 tunngavigalugu sulinngiffeqarneq taamaallaat akuersissutigineqarsinnaasoq meeqqamik paarsassanngortitsilluni inissiineq ukiumik ataatsimik ukiorluunnit ataaseq sinnerlugu sivisussuseqassappat, tak. meeqqanik inuusuttunillu ikiorsiisarneq pillugu Inatsisartut peqqussutaanni iliuusissanut pilersaarussiaq pillugu aalajangersakkat.

Imm. 4 pillugu

Aalajangersagaq taanna nutaajuvoq, erseqqissarlugulu akissarsiaqarlutik sulisartut imm. 1 imaluunniit 2 naapertorlugu sulinngiffeqartut piffissaq meeqqap tiguneqarfia sulinngiffeqarnerullu sivisussusissaa sulisitsisuminnut ilisimatitsissutigissagaat, piffissat pineqartut pineqartumit ilisimaneqalerniariarpata.

Imm. 5 pillugu

Aalajangersagaq taanna nutaajuvoq, erseqqissarlugulu meeqqamik paarsassanngortitsilluni inissiinermut atatillugu sulinngiffeqarnissamik akuersissuteqartarneq pillugu malittarisassat erseqqinnerusut Naalakkersuisut aalajangersarsinnaagaat.

§ 15 pillugu

Imm. 1 pillugu

Aalajangersakkap taassuma peqqussummi atuuttumi § 11, imm. 1 assigaa, annertusineqarsimallunili angajoqqaat saniatigut meeravissartaartut pineqartunut aamma ilaatilerlugit. Aalajangersagaq taanna allaanerulaartunik erseqqinnerusunillu oqaasertalerneqarsimavoq.

Aalajangersakkakkut tassuuna erseqqissarneqarpoq angajoqqaat meeravissartaartulluunniit sapaatit akunnerisa 15-it siulliit qaavisigut sapaatit akunnerini 17-ini sulinngiffeqarsinnaatitaasut.

Imm. 2 pillugu

Aalajangersakkap taassuma peqqussummi atuuttumi § 11, imm. 2 assigaa, annertusineqarsimallunili angajoqqaat saniatigut meeravissartaartut pineqartunut aamma ilaatilerlugit. Aalajangersagaq taanna allaanerulaartunik erseqqinnerusunillu oqaasertalerneqarsimavoq.

Aalajangersakkakkut tassuuna erseqqissarneqarpoq meeqqanut marlunnet amerlanerusunulluunniit ataatsikkut inunngortunut angajoqqaat meeravissartaartulluunniit sapaatit akunnerisa 19-it siulliit qaavisigut sapaatit akunnerini 21-ini sulinngiffeqarsinnaatitaasut.

Imm. 3 pillugu

Aalajangersakkap taassuma peqqussummi atuuttumi § 11, imm. 3 assigaa, annertusineqarsimallunili angajoqqaat saniatigut meeravissartaartut pineqartunut aamma ilaatilerlugit.

Aalajangersakkakkut tassuuna erseqqissarneqarpoq imm. 1 imaluunniit 2 tunngavigalugu angajoqqaat sulinngiffeqarsinnaatitaaneq taamaallaat angajoqqaanit meeravissartaartunilluunniit ataasiakkaarluni atorneqarsinnaasoq.

Imm. 4 pillugu

Aalajangersakkap taassuma peqqussummi atuuttumi § 11, imm. 4 assigaa. Taamaattorli meeqqamik paarsassanngortitsilluni inissiinermik oqaasertai allanngortinneqarsimapput meeqqanik inuusuttunillu ikiorsiisarneq pillugu Inatsisartut peqqussutaat tunngavigalugu angerlarsimaffiup avataanut inissiininngortillugit.

§ 16 pillugu

Aalajangersakkap taassuma peqqussummi atuuttumi § 15 assigaa, pisunullu angajoqqaap toqkkut qimagunneranut napparsimaneranulluunniit tunngasuulluni. Pisutut immikkut ittutut taaneqarsinnaavoq anaanaasup anaanaanissaminik

tigusiumajunnaarnera kissaatiginagulu sulinnigiffeqarnissani, pisumi tassani ataataasup kissaatigaa anaanaasup pisussaafiata tigunissaa. Aalajangersakkakut tassuuna erseqqissarneqarpoq angajoqqaap aappaata sulinnigiffeqarnermik tigusinissaa kommunalbestyrelsip akuersissutigisinnaagaa.

§ 17 pillugu

Imm. 1 pillugu

Aalajangersakkap taassuma peqqussummi atuuttumi § 13, imm. 1 assigaa, oqaasertaali allanngortinneqarsimalutik.

Aalajangersakkakut tassuuna erseqqissarneqarpoq meeraq piffissami angajoqqaat meeravissiartaartulluunniit sulinnigiffeqarsinnaatitaanerisa nalaani napparsimmavimmut unitsinneqarpat piffissaq sulinnigiffeqarfiusoq piffissap napparsimmavimmi uninnganerup sivisoqataanik sivitsorneqassasoq, ataataasup § 8 tunngavigalugu sulinnigiffeqarsinnaatitaanera imaluunniit nalunaarsugaasumik inooqataasup § 12 tunngavigalugu sulinnigiffeqarsinnaatitaanera eqqaassanngikkaanni, taamaattorli sivisunerpaamik sapaatit akunneri 13-it tikillugit. Tamatuma pissuseqataa atuuppoq meeraq nakorsap naliliinera pissutigalugu piffissap meeqqap erniunerata kingornatigut napparsimmavimmi nalinginnaasumik uninngavigisaata kingornatigut meeraq angerlartinneqarsinnaanngippat.

Imm. 2 pillugu

Aalajangersakkap taassuma peqqussummi atuuttumi § 13, imm. 2 assigaa.

Aalajangersakkakut tassuuna erseqqissarneqarpoq angajoqqaap meeravissiartaartulluunniit sulinnigiffeqarsinnaatitaanermik atuisup sulinnigiffeqarnini meeqqap unitsinneqarnera pissutigalugu kipitippagu piffissap sulinnigiffeqarfiusup sinnera meeqqap angerlartinneqarneranut atatillugu sulinnigiffeqarfigineqarsinnaasoq.

§ 18 pillugu

Imm. 1 pillugu

Aalajangersakkap taassuma peqqussummi atuuttumi § 14, imm. 1 ilaannakortumik assigaa.

Aalajangersakkakut tassuuna erseqqissarneqarpoq qinikkatut pisortaniluunniit toqqakkatut suliaasaqartitaanerup pikkorissartitsinernilu sivikinnerusuni suliamut attuummassuteqartuni peqataanerup saniatigut ataatsimeersuarnerni, aalajangersimasunik sammisaqarluni ulluni aalajangersimasuni ingerlatsinerni assigisaannilu peqataanerit piffissamik sulinnigiffeqarfiusumik kipititsisuunngitsut

aamma ilanngunneqartut. Allannortitsisoqarpoq sulinngiffeqartup suliaticigut pisinnaasaasa nutarterneqarnissaannut ineriartorteqqinneqarnissaannulluunniit annertunngikkaluamik periarfissiinissaq qulakkeerniarlugu.

Aajangersakkakut anguniarneqarpoq pikkorissarnernut suliamut tunngasunut isumasioqatigiinnernilu il. il. peqataanissat sulinngiffeqartup nammineerluni suliniutissarigaa kiisalu sulisitsisup sulisorisap sulinngiffeqarnerup nalaani pikkorissanernut il.il. peqataatinniarlugu pinngitsaaliniarsinnaangikkaa.

Aalajangersakkakut tassuuna ilaatigut ilinniartut atuartulluunniit misilitsinnerni soraarummeernerniluunniit sulinngiffeqarneq kipitinngikkaluarlugu peqataasinnaanerat qulakkeerneqarpoq. Sulinngiffeqarnermik kipititsineq peqqussut atuuttoq tunngavigalugu ilinniartup atuartulluunniit ilinniarnerninik atuarnernilluunniit aatsaat ukiup affaata ukiulluunniit ilivitsup qaangiunnerani ingerlatseqqissinnaalerneranik nassataqartussaavoq.

Imm. 2 pillugu

Aalajangersakkap taassuma peqqussummi atuuttumi § 12, imm. 1 assigaa.

Aalajangersakkakut tassuuna erseqqissarneqarpoq sulinngiffeqarneq kipitinneqartutut isigineqassasoq sulineq ilinniarnerniluunniit aallarteqqinneqarpat, angajoqqaap aappaa tamatumunnga atatillugu sulinngiffeqarluni aallartinnigippat, taamaattorli tak. § 17, imm. 2 aamma § 19. Akissarsiaqaatigalugu feriarnersiutisiaqaatigaluguluunniit feriarneq piffissamik sulinngiffeqarfiusumik taamatuttaaq kipititsineruvoq.

Imm. 3 pillugu

Aalajangersagaq aalajangersakkatut immikkut nutaajuvoq, erseqqissarlugulu sulinngiffeqarneq kipitinneqarpat sulinngiffeqarnerup sinnera atorunnaassasoq. Aalajangersagaq taanna peqqussummi atuuttumi § 12, imm. 1-ip ilagaa.

§ 19 pillugu

Imm. 1 pillugu

Aalajangersagaq taanna nutaajuvoq, erseqqissarlugulu ilinniartut sulinngiffeqarneq kipitinngikkaluarlugu atuartitsinermi annikinnerusumik peqataasinnaasut.

Imm. 2 pillugu

Aalajangersagaq taanna nutaajuvoq, erseqqissarlugulu annikinnerusumik peqataaneq tassaasinnaasoq immikkut suliassamik allaaserinnineq, ilinniaqatinik

ataatsimeeqateqarneq imaluunniit pingaanninnerusunik atuartitsinermi peqataaneq ilinniartup piffissami sulinngiffeqarfiusumi ilinniarnermik ingerlatsineratut isigineqarsinnaaneramik nassataqanngitsoq.

Imm. 3 pillugu

Aalajangersagaq taanna nutaajuvoq, erseqqissarlugulu soraarummeerneq erninerup kingunitsiannua pissappat, soraarummeernermullu peqataanngitsoorneq ilinniarnerp piffissamik sivisuumik sivitsorneqarneramik kinguneqassappat sulinngiffeqarneq kipitinnikkaluarlugu soraarummeernermi peqataaneq akuerineqarsinnaasoq.

Aalajangersagaq taanna ilanngunneqarpoq ilinniartup erninermi kingunitsiannua soraarummeernermi peqataanngikkuni ilinniarnernik sivitsuivallaartarnissaa pinngitsoortinniarlugu.

Imm. 4 pillugu

Aalajangersagaq taanna nutaajuvoq, erseqqissarlugulu piffissamik sivikitsumik oqarnermi erninerup kingornatigut piffissaq qaammatip ataatsip iluani pineqartoq.

§ 20 pillugu

Aalajangersakkap taassuma peqqussummi atuuttumi § 5 assigaa. Taamaattorli erninerup kingorna piffissaq arnap sulileqqinnissaminik eqqarsaateqarnerminik sulisitsisuminut ilisimatitsiffissaa sapaatit akunnerinit arfineq pingasunit sapaatit akunnerinut 12-inut sivitsorneqarpoq, tamannami piffissap sulinngiffeqarfiusup sivisussusia eqqarsaatigalugu piffissaalluarmat.

§ 21 pillugu

Imm. 1 pillugu

Aalajangersakkap taassuma peqqussummi atuuttumi § 6 imm. 1 assigaa, taamaattorli allanngortinneqarluni “Angut akissarsiaqarluni sulisartog”-miit “Ataataasoq, meeravissartaartutut ataataasoq imaluunniit nalunaarsugaasumik inooqataasoq”-mut, taamaalilluni sullinniakkat tamarmik ilaalissallutik.

Aalajangersakkakkut tassuuna erseqqissarneqarpoq ataataasoq, meeravissartaartutut ataataasoq aamma nalunaarsugaasumik inooqatigiinnermi aappaasoq pisussaaffeqartoq sulinngiffeqarnissaq kissaatigineqarpat tamatuma sulisitsisumut ilisimatitsissutiginissaanut. Tassuuna aamma aalajangersarneqarpoq piffissaq sulinngiffeqarfiup ingerlanneqarfissaatut nalunaarutigineqaqqaartoq

allanngortinneqarsinnaasoq, meeraq napparsimmavimmut unitsinneqarpat, imaluunniit napparsimmavimmi nalinginnaasumit sivisunerusumik uninngassappat.

Imm. 2 pillugu

Aalajangersakkap taassuma peqqussummi atuuttumi § 6, imm. 2 assigaa. Aalajangersakkakkut tassuuna erseqqissarneqarpoq meeraq napparsimmavimmi uninngasarneq nalinginnaasoq sinnerlugu napparsimmavimmiissappat imaluunniit napparsimmavimmut unitsinneqarpat akissarsiaqarluni sulisartup sulinngiffeqarnissamik imm. 1 tunngavigalugu nalunaarutigisaa allanngortinneqarsinnaasoq. Sulisitsisoq tamatuminnga ilisimatinneqassaq, napparsimmavimmut unitsitsineq imaluunniit napparsimmavimmi uninnganerup sivitsorneqarnissaa ilisimaneqalerniariartoq.

§ 22 pillugu

Aalajangersakkap taassuma peqqussummi atuuttumi § 7 assigaa, erseqqissarlugulu akissarsiaqarluni sulisartup sulinngiffeqarsinnaatitaanera meeqqap napparsimmavimmut unitsinneqarnera pissutigalugu sivitsorneqassappat, tak. § 17, akissarsiaqarluni sulisartup tamanna sulisitsisumut ilisimatitsissutigissagaa, sivitsuineq akissarsiaqarluni sulisartumit ilisimaneqalerniariapat. Taamatutaaq akissarsiaqarluni sulisartup sulisitsisoq meeqqap ineriartorneranik kiisalu sulinngiffeqarnerup sivitsorneqarnissaanik ilisimatissavaa.

§ 23 pillugu

Aalajangersakkat taassuma peqqussummi atuuttumi § 8 assigaa. Aalajangersakkakkut tassuuna erseqqissarneqarpoq akissarsiaqarluni sulisartoo angajoqqaat aappaata sulinngiffeqarsinnaatitaaneranik tigusiuni, tak. § 16, tamanna kiisalu piffissap sulinngiffeqarfiusussap sivisussusia sulisitsisuminut ilisimatitsissutigissagaa. Ilisimatitsineq piffissap sulinngiffeqarfiusussap aallartinnissaa sapaatit akunerinik arfineq pingasunik sioqqullugu pissaaq. Pisarialimmik pisoqartillugu, tak. § 16, ilisimatitsineq pissaaq kingusinnerpaamik piffissap sulinngiffeqarfissap aallartiffissaa sapaatip akunneranik ataatsimik sioqqullugu

§ 24 pillugu

Imm. 1 pillugu

Aalajangersakkap taassuma peqqussummi atuuttumi § 19, imm. 1 assigaa. Aalajangersakkap taassuma erseqqissarpaa sulinngiffeqarnermi ullormusiat sulinngiffeqartup qinnuteqarneratigut sulinngiffeqartumut isertitatut nalinginnaasumik akileraaruteqaataasussatut tunniunneqartassasut.

Imm. 2 pillugu

Aalajangersakkap taassuma peqqussummi atuuttumi § 19, imm. 2 assigaa. Aalajangersakkakut tassuuna erseqqissarneqarpoq erninermut atatillugu sulinnigiffeqarnerup nalaani ullormusiat feriarnersiutisiassanik katersissutaasinnaanngitsut.

§ 25 pillugu

Imm. 1 pillugu

Aalajangersakkap taassuma peqqussummi atuuttumi § 21, imm. 1 imarisamigut assigaa, ullormusiat amerlassusiisa aalajangersarneqarnerat eqqarsaatigalugu, tassami nalunaaquttap akunneranut aalajangersimasunik amerlassusiligaasuni suli pisartagaqartitsisoqassammat, SIK-p pisortallu sulisitsisuisa ilinniagaqarsimanngitsut pillugit isumaqatigiissutaat tunngavigalugu sulisunut 18-ileereersimasunut akissarsiat ikinnerpaaffissaat atorlugit.

Imm. 2 pillugu

Aalajangersagaq taanna nutaajuvoq, erseqqissarlugulu ullormusiassanut amerlassusiliunneqartut isumaginninnermi aningaasanngorlugit tunniunneqartut pillugit kaajallaasitami Isumaginninnermut Naalakkersuisoqarfiup ukiumut ikinnerpaamik ataasiarluni saqqummersittagaani takuneqarsinnaasut.

§ 26 pillugu

Imm. 1 pillugu

Aalajangersakkap taassuma peqqussummi atuuttumi § 19, imm. 3 imarisamigut assigaa, utoqqalinnermi pensionisiallit pisortanillu siusinaartumik pensionisiallit eqqarsaatigalugit.

Imm. 2 pillugu

Aalajangersakkap taassuma peqqussummi atuuttumi § 19, imm. 3 imarisamigut assigaa, inuit pinerluuteqarsimasunik isumaginnittoqarfiup isertitsiviutaanut inissinneqasimasut eqqarsaatigalugit.

§ 27 pillugu

Imm. 1 pillugu

Aalajangersakkap taassuma peqqussummi atuuttumi § 20 imarisamigut assigaa, erseqqinnerusunilli oqaasertalerneqarsimalluni. Aalajangersakkakkut tassuuna erseqqissarneqarpoq sulinngiffeqartoq sulinngiffeqarnermini taassumaluunniit ilaani akissarsiaqarpat, feriarnersiutisiaqarpat, sulinermi isertitatigut annaasanut taarsiissutisiaqarpat assigisaannilluunniit pisartagaqarpat piffissami pisartakkanik qulaani taaneqartunik tunniussiviusartuni ullormusiaqartitsisoqassanngitsoq.

Imm. 2 pillugu

Aalajangersagaq taanna nutaajuvoq, erseqqissarlugulu piffissap sulinngiffeqarfiusup ilaani isumaqatigiissut tunngavigalugu akissarsiaqartoqarpat ullormusiat piffissap taassuma naanerani tunniunneqartalissasut.

Tassuuna erseqqissarneqarpoq ullormusianik tunniussisarneq aatsaat aallartinneqartassasooq piffissaq akissarsiaqarluni sulinngiffiusooq naagaangat.

§ 28 pillugu

Imm. 1 pillugu

Aalajangersagaq taanna nutaajuvoq, erseqqissarlugulu suliffissarsiortut pisortanit ikiorsiissutit pillugit peqqussut naapertorlugu ikiorsiissutisisartut erniffissatullugu naatsorsuutigisaq sioqqullugu sapaatit akunnerini 13-ini kingullerni suliffeqarnermut attuumassuteqarsimangitsut sulinngiffeqarsinnaatitaasut, ullormusiaqarsinnaatitaanatilli.

Taamaalilluni aalajangersakkakkut tassuuna erseqqissarneqarpoq inuit pisortanit ikiorsiissutit pillugit peqqussut naapertorlugu ikiorsiissutisisartut suliffeqarnermullu attuumassuteqarsimangitsut sulinngiffeqarsinnaatitaasut, ullormusiaqarsinnaatitaanatilli.

Imm. 2 pillugu

Aalajangersagaq taanna nutaajuvoq, erseqqissarlugulu imm. 1 naapertorlugu suliffissarsiortut piffissami sulinngiffeqarfiusup nalaami pisortanit ikiorsiissutisisaannarsinnaasut, tamatumunnga piumasaqaatit eqqortinneqarsimappata.

§ 29 pillugu

Imm. 1 pillugu

Aalajangersakkap taassuma peqqussummi atuuttumi § 21, imm. 2 assigaa, akissarsiaqarluni sulisartup sulinngiffeqarnerup aallartinnera sioqqullugu sapaatit akunnerini 13-ini suliffeqarnermut attuumassuteqarnera eqqarsaatigalugu.

Imm. 2 pillugu

Aalajangersagaq taanna nutaajuvoq, erseqqissarlugulu sapaatit akunnerinik 13-inik naatsorsuineri suut ilaatinneqassanersut.

Aalajangersakkakkut tassuuna erseqqissarneqarpoq sapaatit akunnerinik 13-inik naatsorsuineri piffissat akissarsiaqarluni sulisartup akissarsiaqarluni sulisartutut suliffigisimasai, akissarsiaqarluni feriarnersiutisiaqarluniluunniit feriarfigisimasai, pikkorissarnernut suliamut tunngasunut peqataaffigisimasai suliffeqanngikkallarnermilu ikiorsiissutit pillugit Inatsisartut peqqussutaat naapertorlugu suliffeqanngikkallarnermi ikiorsiissutisisinnaatitaaffigisimasai ilanngullugit naatsorsorneqartassasut.

§ 30 pillugu

Aalajangersagaq taanna peqqussummi atuuttumi § 21, imm. 2-mi ilaavoq, matumanili alajangersakkatut immikkut ilanngunneqarsimalluni.

Aalajangersakkakkut tassuuna erseqqissarneqarpoq sapaatit akunnerisa 13-it taakkua iluanni nalunaaquttap akuneri tamarmik, aamma qaangiuttoonerit, katinneqassasut. Nalunaaquttap akunnerisa tamarmiusut nalunaaquttap akunneri 520-t, sapaatip akunneranut agguaqatigiissitsinermi nalunaaquttap akunnerinut 40-nut naapertuuttut, sinnersimappatigit nalunaaquttap akunneri 40-innaat tunniunneqartassasut.

§ 31 pillugu

Imm. 1 pillugu

Aalajangersakkap taassuma peqqussummi atuuttumi § 20, imm. 2 assigaa, aalajangersagarli taanna taamaallaat akissarsiaqarlutik sulisartunut tunngasuulluni.

Aalajangersakkakkut tassuuna erseqqissarneqarpoq sapaatip akunneranut nalunaaquttap akunneri ullormusiaqaataasinnaasut akissarsiaqarluni sulisimanerit ataasiakkaat aallaavigalugit naatsorsorneqartassasut, piffissat § 29, imm. 2-mi taaneqartut ilanngullugit.

Inuk assersuutigalugu sapaatit akunnerinit 13-iusunit sapaatit akunnerini arfineq pingasuni suliffeqanngikkallarnermi ikiorsiissutisisinnaatitaasimappat sapaatip akunneranut nalunaaquttap akunnerisa agguaqatigiissinneqarnerat appasissorujussuusaq, sapaatit akunneri pineqartup suliffeqanngikkallarnermi ikiorsiissutisivigisarsimasai ilanngunnagit naatsorsuisoqarsimappat. Tamatuma

pissuseqataa piffissat feriarfiusut pikkorissarfiusullu eqqarsaatigalugit aamma atuuppoq.

Imm. 2 pillugu

Aalajangersagaq taanna nutaajuvoq, erseqqissarlugulu akissarsiaqarlutik sulisartut sapaatit akunnerini 13-ini kingullerni sapaatit akuneranut nalunaaquttap akunnerini aalajangersimasunik amerlassusilinni atorfeqartitaasimasut eqqarsaatigalugit sapaatip akunneranut nalunaaquttap akunneri taakku nalunaaquttap akunnerani aalajangersimasunik amerlassusiligaasunik ullormusiaqartitsiviusassasut.

Aalajangersagaq taanna peqqussut atuuttoq eqqarsaatigalugu erseqqissaaneruvoq.

Imm. 3 pillugu

Aalajangersagaq taanna nutaajuvoq, erseqqissarlugulu akissarsiaqarlutik sulisartut aalajangersagaariinngitsumik sivisussusilimmi sulisartut eqqarsaatigalugit ullormusiat sulinnginnerup aallartinnera sioqqullugu sapaatit akunnerini 13-ini kingullerni nalunaaquttap akunnerisa suliffiusimasut agguaqatigiissinneqarnerat tunngavigalugu naatsorsorneqartassasut.

Aalajangersagaq taanna peqqussut atuuttoq eqqarsaatigalugu erseqqissaaneruvoq.

Imm. 4 pillugu

Aalajangersagaq taanna nutaajuvoq, erseqqissarlugulu sapaatit akunnerini 13-ini nalunaaquttap akunneri suliffiusimasut nalinginnaasutut isigineqarsinnaanngippata sulinnginnerup aallartinnera sioqqullugu sapaatit akunnerini 26-ni kingullerni nalunaaquttap akunnerisa suliffiusimasut agguaqatigiissinneqarnerat atorfeqartassasoq.

Aalajangersagaq taanna ilanngunneqarpoq pisut inuup sulinnginneq sioqqullugu sapaatit akunnerini 13-ini kingullerni sulisimanerata nalinginnaanngitsuusinnaanera sillimmaanniarlugu.

Imm. 5 pillugu

Aalajangersagaq taanna peqqussummi atuuttumi § 21, imm. 5-ip ilagaa, erseqqissarlugulu akissarsiaqarluni sulisartoq sulinnginnerup aallartinnera sioqqullugu sapaatit akunnerini 13-ini kingullerni suliffeqarnermut attuumassuteqarsimappat, nalunaaquttalli akunneri suliffiusimasut 182-init ikinneruppata piffissami tamarmi suliffiusimasut nalunaaquttap akunnerinut 182-inut aalajangersarneqartassasut. Kisitsit siusinnerusukkut 180-iusimasoq 182-imut allanngortinneqarsimavoq, tassami kisitsit 182 kisitsimmik 13-imik

agguarneqarsinnaammat, aammattaarlu kisitsimmut suliffeqanngikkallarnermi ikiorsiissutinik naatsorsuinermi suliffeqanngikkallarnermi ikiorsiissutisisinnaassagaanni ikinnerpaaffiliussatut atorneqarluni.

§ 32 pillugu

Imm. 1 pillugu

Aalajangersakkap nalunaarummi atuuttumi § 1, imm. 1 assigaa, erseqqissarlugulu namminersorluni inuussutissarsiortoq ullormusiaqarsinnaatitaassaguni inuussutissarsiornermik ingerlatsinini piffissami unitsissimassagaa inuussutissarsiornermilluunniit ingerlatsinini allanut isumagisassanngortissimassagaa.

Namminersorluni inuussutissarsiuteqarneq isumaqarpoq inuit, namminersorlutik inuussutissarsiommik ingerlatsisut, soorlu assassorluni sulianik ilinniarsimasut, niuernermik ingerlatallit, aalisartut, piniartut, savaatillit, naasorissaasoq/nunalerisoq aammalu anaanat ulluunerani allat meeraannik paarsisartut.

Imm. 2 pillugu

Aalajangersakkap nalunaarummi atuuttumi § 2, imm. 1 assigaa erseqqissarlugulu namminersorluni inuussutissarsisortup katissimallugu aapparisaq inooqataaluunniit namminersorluni inuussutissarsisortumut ikiortaasoq ullormusiaqarsinnaatitaassaguni katissimallugu aapparmi inooqatimiluunniit inuussutissarsiortuluni ingerlatsinerani ikiortaanini piffissami unitsissimassagaa.

Namminersorluni inuussutissarsisortumut katissimallugu aappaasoq inooqataasorluunniit paasineqassaaq tassaasoq namminersorluni inuussutissarsiornermik ingerlatsinermi tamakkiisumik ilaannakortumilluunniit peqataasoq.

Namminersorluni inuussutissarsisortumut inooqataasoq paasineqassaaq tassaasoq inuit nalunaarsorneqartarfianni namminersorluni inuussutissarsisortup najugaanut nalunaarsorsimasooq inooqatiginnittorlu.

§ 33 pillugu

Imm. 1 pillugu

Aalajangersakkat taassuma peqqussummi atuuttumi § 21, imm. 5 assigaa, erseqqinnerusunilli oqaasertalersorneqarsimalluni.

Aalajangersakkakkut taassuna erseqqissarneqarpoq namminersorlutik inuussutissarsisortut aamma namminersorlutik inuussutissarsisortut katissimallugit

aappaat inooqqataallu namminersorlutik inuussutissarsiortunut ikiortaasut sulinngiffeqarnerup aallartinnera sioqqullugu sapaatit akunnerini 13-ini kingullerni akissarsiaqaataasumik suliffeqarsimangitsut eqqarsaatigalugit sapaatip akunneranut nalunaaquttap akunnerinut suliffiusimasunut 14-inut ullormusiaqaatasinnaasunut aalajangersarneqartassasut, sulinngiffeqartup isertitatigut sulinngiffeqarnerup nalaani annaasat ullormusiat aningaasartaannut nikingasorujussuunissaat uppersarsinnaanngippagu.

Imm. 2 pillugu

Aalajangersakkap taassuma nalunaarummi atuuttumi § 13, imm. 1 assigaa, allatulaarli oqaasertalersorneqarsimalluni. Aalajangersakkakkulli tassuuna erseqqissarneqarpoq inuup isertitatigut annaasaqarneq ilimanarsisinnaagaa pineqartoq sapaatit akunnerini 13-ini kingullerni nalunaaquttap akunnerini 14-ini SIK isumaqatigiissutaa tunngavigalugu sapaatit akunnerini 13-ini akissarsiat ikinnerpaaffiat naatsorsuutigalugu isertitanit amerlanerusunik isertitaqarnermik nassataqartumik suliaqarsimanini pillugu uppersarsaatinik saqqummiussinermigut.

Imm. 3 pillugu

Aalajangersakkakkut tassuuna erseqqissarneqarpoq pisuni sulinngiffeqartup SIK-p isumaqatigiissutaa tunngavigalugu akissarsiat ikinnerpaaffiannik akissarsiaqarluni sulinermit annertunerusumik isertitaqarsimanerup pineqarneranik ilimanarsisitsivigisaani suliunnaarneq sioqqullugu sapaatit akunnerini 13-ini kingullerni isertitarpiaasimasut aallaavigalugit naatsorsuisoqartassasoq.

Sapaatit akunnerini 13-ini isertitarpiaasimasut SIK-p isumaqatigiissutaa tunngavigalugu akissarsiat ikinnerpaaffiannik agguarneqassapput, taamaalillutillu piffissami tamarmi nalunaaquttap akunneri tamarmiusut saqqummissallutik. Kisitsit taanna 13-inik agguarneqassaaq, sapaatip akunneranut nalunaaquttap akunneri ullormusiat aningaasartaasa naatsorsorneqarneranni atorneqartussat pissarsiariniarlugit.

Imm. 4 pillugu

Aalajangersagaq taanna nutaajuvoq. Aalajangersakkakkut tassuuna erseqqissarneqarpoq sapaatit akunnerini 13-ini kingullerni isertitat nalinginnaasutut isigineqarsinnaanngippata ukiumi kingullermi isertitat aallaavigineqartassasut.

§ 34 pillugu

Aalajangersakkap taassuma nalunaarummi atuuttumi § 13 imarisamigut assigaa.

Aalajangersagaq taanna ilanngunneqarpoq inuit namminersorlutik inuussutissarsiortuujutigalutik akissarsiaqarlutik sulisartuusut qulakkeerunniarlugit.

§ 35 pillugu

Aalajangersakkap taassuma peqqussummi atuuttmi § 21, imm 3 assigaa, taamaattorli oqaasertalersorneqarnermigut allannguuteqartinneqalaarsimalluni.

Aalajangersakkakut tassuuna erseqqissarneqarpoq ilinniartut ilinniarneminnit sulingiffeqartut sulingiffeqarnermik nalaani ilinniarnersiutisisinnaanngitsut, praktikkernermi tapiissutisisinnaanngitsut praktikkernermiluunnit akissarsiaqarsinnaanngitsut ullormusiaqarsinnaatitaassasut, ilinniarnersiutit, praktikkernermi tapiissutit praktikkernermiluunniit akissarsiat amerlaqataannik, meeqqanut pilersuisussaataaffigisaminnut tapit ilanngullugit. Tapit taakku meeqqanut akilersuutit pillugit Inatsisartut peqqussutaat tunngavigalugu meeqqanut akilersuutit sukkulluunniit atuuttut amerlaqatigaat.

Meeqqat tapiinut amerlassusiliussat isumaginninnermi aningaasanngorlugit tunniunneqartartut pillugit kaajallaasitami Isumaginninnermut Naalakkersuisoqarfiup ukiumut ikinnerpaamik ataasiarluni saqqummersittagaani takuneqarsinnaapput.

§ 36 pillugu

Aalajangersakkap taassuma peqqussummi atuuttumi § 21, imm. 4 assigaa, erseqqissarlugulu atuartut sulingiffeqarnerup aallartinnissaa sioqqullugu sapaatit akunnerini 13-ini kingullerni meeqqat atuarianni klassini angajullerni atuartunut tapiissutisisarsimasut ullormusiaqarsinnaatitaasut, manna tikillugu tapiissutisarineqartarsimasut amerlaqataannik, meeqqanut akilersuutit pillugit Inatsisartut peqqussutaat tunngavigalugu meeqqanut akilersuutit nalinginnaasut amerlaqataannik tapilerneqartunik.

§ 37 pillugu

Imm. 1 pillugu

Aalajangersakkap taassuma nalunaarummi atuuttumi § 10, imm. 2 assigaa, erseqqissarlugulu sulingiffeqartoq naartunermut atatillugu piffissap ilaannaani akissarsiaqarluni sulisarsimappat ullormusiat ikililat sulingiffeqartumut tunniunneqarsinnaasut, tak. § 7, imm. 6.

Imm. 2 pillugu

Aalajangersakkap taassuma nalunaarummi atuuttumi § 12, imm. 1 imarisamigut assigaa, ullormusiat ikililat qinnuteqartup piffissap ilaannaani sapaatip akunneranut

sulinngiffeqarfigisai piffissamut sapaatip akunneranut suliffiusussatut aalajangersarneqarsimasunut sanilliullugit tunniunneqartarnissaat eqqarsaatigalugu.

Ullormusiat nalunaaquttap akunnerinut inuup pineqartup sapaatip akunneranut nalunaaquttap akunnerisa nalinginnaasumik suliffigisartagaasa ikileriaataannut tunngatillugit tunniunneqartassapput. Inuk assersuutigalugu sapaatip akunnerani nalunaaquttap akunnerini agguaqatigiissillugit 30-ni sulisarsimappat, naartuninili pissutigalugu nalunaaquttap akunnerini 20-nnarni sulisarsimalluni, taava ullormusiat nalunaaquttap akunnerinut qulinut tunngatillugit tunniunneqartassapput. Naartusoq sapaatip akunerani nalunaaquttap akunerini 40-ni sulisartoq naartunini pissutigalugu sapaatip akunnerani nalunaaquttap akunnerini 15-ini sulisarnermut apparipat sapaatip akunneranut nalunaaquttap akunnerini 25-ni ullormusiat tunniunneqarsinnaappat. Inulli sapaatip akunnerani nalunaaquttap akunnerini agguaqatigiissillugu 48-ni sulisartoq piffissap ilaannaani sapaatip akunnerani nalunaaquttap akunnerini 20-ni sulisalerpat sapaatip akunnerani nalunaaquttap akunnerini 20-ni ullormusiaqartitsisoqarsinnaasussaavoq, tassa imaappoq agguaqatigiissitsinermi nalunaaquttap akunneri naatsorsuutigineqartussat sapaatip akunneranut 40-innaasinnaasut.

Imm. 3 pillugu

Aalajangersagaq taanna nutaajuvoq, erseqqissarlugulu piffissap ilaannaani sulinngiffeqalerneq sioqqullugu sapaatip akunneranut nalunaaquttap akunneri aalajangersimasasut pineqanngippata ullormusiat ikiliasat sulinngiffeqartup sulinngiffeqarnerup aallartinnera sioqqullugu sapaatit akunnerini 13-ini kingullerni agguaqatigiissitsinermi nalunaaquttap akunneri suliffigisarsimasai aallaavigalugit naatsorsorneqartassasut, taamaattorli sapaatip akunnerani nalunaaquttap akunnerinut amerlanerpaamik 40-nut, qinnuteqartup piffissap ilaannaani sulisarnerani sapaatip akunnerani nalunaaquttap akunneri suliffigisarsimasai ilanngaatilugit.

§ 38 pillugu

Imm. 1 pillugu

Aalajangersakkap taassuma nalunaarummi atuuttumi § 11, imm. 3 assigaa, allatulli oqaasertalersorneqarsimalluni, taamaallaallu piffissami sulinngiffeqarfiusumi qinikkatut pisortanillu toqqagaasutut suliassaqartitaanerup nassatarisaanik isertitanut tunngasuulluni.

Aalajangersakkakkut tassuuna erseqqissarneqarpoq sulinngiffeqartoq piffissami sulinngiffeqarfiusumi qinikkatut pisortanillu toqqagaasutut taakkuluunniit assigisaannik suliassaqartinneqarsimappat ulluni pineqartup isertitaqarfigisimasaani ullormusiat tunniunneqartassanngitsut.

Imm. 2 pillugu

Aalajangersakkakut tassuuna erseqqissarneqarpoq, isertitat imm. 1 malillugu ullormusiat aningaasartaannut naleqqiullugit ikinnerusimappata ullormusiassarititaasut amerlassusaannut naapertuuttunngorlugit ullormusianik taperneqarsinnaapput.

§ 39 pillugu

Imm. 1 pillugu

Aalajangersakkap taassuma peqqussummi atuuttumi § 22, imm. 1 assigaa, erseqqissarlugulu peqqussut manna tunngavigalugu ullormusiat tunniunneqarnissaannik qinnuteqaatit sulinngiffeqartup aalajangersimasumik najugaqarfigisaani inunnillu nalunaarsuiffimmi nalunaarsorneqarfigisimasaani kommunalbestyrelsimut tunniunneqartassasut.

Imm. 2 pillugu

Aalajangersakkap taassuma peqqussummi atuuttumi § 22, imm. 2 assigaa, erseqqissarlugulu sulinngiffeqartoq kommunit agguataarneqarnerisa avataanni aalajangersimasumik najugaqarpat qinnuteqaat Isumaginninnermut Naalakkersuisoqarfimmut suliamik suliarinninnermik isumaginnittumut tunniunneqartassasoq.

Imm. 3 pillugu

Aalajangersakkap taassuma peqqussummi atuuttumi § 22, imm. 3 assigaa, qaammatillu pingasut qaammatinut tallimanut allanngortinneqarsimallutik. Aalajangersakkakut tassuuna erseqqissarneqarpoq ullormusiaqarnissamik qinnuteqaat ullormusiaqarsinnaatitaanerup atuutilerneranit qaammatit tallimat qaangiunneranni tunniunneqarsimanngippat ullormusiaqarsinnaatitaaneq atorunnaartassasoq.

Imm. 4 pillugu

Aalajangersagaq taanna nutaajuvoq, erseqqissarlugulu ullormusiaqarsinnaatitaaneq atuutilersartoq akissarsiat, ilinniagaqarnersiutit isertitalluunniit allat naartunermut, erninnermut meeravissiarternermullu atatillugu sulinngiffeqarneq pissutigalugu unippata.

§ 40 pillugu

Imm. 1 pillugu

Aalajangersakkap taassuma peqqussummi atuuttumi § 23, imm. 1 assigaa, allatulaarli oqaasertalersorneqarsimalluni. Aalajangersakkakut tassuuna erseqqissarneqarpoq ullormusianik tunniussineq sapaatit akunneri marlukkaarlugit piffissarluunniit sivikinnerusukkaarlugu tunniuneqartassasut kommunalbestyrelsi aalajangiisinnaasoq.

Imm. 2 pillugu

Aalajangersakkap taassuma peqqussummi atuuttumi § 23, imm. 2 assigaa, erseqqissarlugulu pissutsit immikkut ittut tamanna ajornartinnigippassuk ullormusiat tamakkiisumik ilaannakortumillunniit aningaasannagornagit kisianni nerisassanngorlugit/atisassanngorlugit tunniuneqartassasut kommunalbestyrelsi aalajangiisinnaasoq. Aammattaaq kommunalbestyrelsi pisuni immikkut ittuni aalajangiisinnaavoq ullormusiat kommunalbestyrelsimit tamakkiisumik ilaannakortumillunniit aqunneqassasut.

§ 41 pillugu

Imm. 1 pillugu

Aalajangersakkap taassuma peqqussummi atuuttumi § 25, imm. 1 assigaa, erseqqissarlugulu peqqussut manna tunngavigalugu ullormusiaqartoq pisussaaffeqartoq pissutsini nammineq atukkani meeqqalluunnit atugaani allannguutit ullormusiaqarsinnaatitaanerup annikillisinneqarneranik atorunnaarneranilluunniit nassataqarsinnaasut oqartussaasumut tunniussisartumut nalunaarutigissallugit.

Imm. 2 pillugu

Aalajangersakkap taassuma peqqussummi atuuttumi § 25, imm. 2 assigaa, erseqqissarlugulu aningaasat pissutsit imm. 1-imi taaneqartut pillugit paasissutissat nalunaarutigineqanngitsoornerat imaluunniit qinnuteqartup paasissutissanik suliap suliarineqarnerani atorneqartussanik eqqunngitsunik tunniussisimanera pissutigalugu pissutissaqarnani tiguneqartut utertillugit akilerneqartussaasut.

§ 42 pillugu

Aalajangersakkap taassuma peqqussummi atuuttumi § 26 assigaa, erseqqissarlugulu qinnuteqartoq piffissami ullormusiaqarfiusumi taannaasumi pineqartup pilersorneqarneranut tamakkiisumik ilaannakortumilluunniit matussutissatut taarsiissutinik assigisaannilluunniit tigusaqarsimappat ullormusiat tunniuneqartut oqartussaasup ullormusianik tunniussisup utertillugit akileqqusinnaagai.

Aningaasat akissarsianut assigisaannulluunniit taarsiissutitut tunniunneqartut piffissamilu sulinngiffeqarfiusumi pilersuinermit atugassatut naatsorsuunneqartut tassani pineqarput. Aningaasat taakku ullormusiat aningaasartaannit ikinneruppata ilassutissatut ullormusianik tunniussisoqartassaaq.

§ 43 pillugu

Imm. 1 pillugu

Aalajangersakkap taassuma peqqussummi atuuttumi § 27, imm. 1 assigaa, erseqqissarlugulu Inatsisartut inatsisaat manna tunngavigalugu ullormusianut aningaasartuutit Nunap Karsianit 90 %-tii kommuninillu 10 %-tii akilerneqartassasut.

Imm. 2 pillugu

Aalajangersakkap taassuma peqqussummi atuuttumi § 27, imm. 2 assigaa, erseqqissarlugulu utertitsilluni akiliisarneq, naatsorsuutininik saqqummiussisarneq, kukkuneruineq nakkutilliinerlu pillugit malittarisassat erseqqinnerusut Naalakkersuisut aalajangersassagaat.

§ 44 pillugu

Imm. 1 pillugu

Aalajangersakkap taassuma peqqussummi atuuttumi § 28 assigaa. Aalajangersakkakkut tassuuna erseqqissarneqarpoq kommunalbestyrelsip peqqussut manna tunngavigalugu aalajangiineri Isumaginninnermi Naammagittaalliuuteqartarfimmut naammagittaallitigineqarsinnaasut, isumaginnittoqarfiup aqunneqarnera aaqqissuussaanageralu pillugit Inatsisartut peqqussutaat tunngavigalugu.

§ 45 pillugu

Imm. 1 pillugu

Piffissaq atortuulersitsivik 1. januar 2010-iussasoq aalajangersakkakkut tassuuna erseqqissarneqarpoq.

Imm. 2 pillugu

Aalajangersakkakkut tassuuna erseqqissarneqarpoq naartunermi, erninermi meeravissiartaarnermilu sulinngiffeqartarneq il.il. ullormusiaqartarnerlu pillugit

Inatsisartut peqqussutaat nr. 12, 31. oktober 1996-imeersoq kingusinnerusukkut allannguutit ilanngullugit tamatumunnga peqatigitillugu atorunnaarsinneqassasoq.

Kingusinnerusukkut allannguutit tassaapput naartunermi, erninermi meeravissartaarnermilu sulinnigiffeqartarneq il.il. ullormusiaqartarnerlu pillugit Inatsisartut peqqussutaat nr. 12, 30. oktober 1998-imeersoq, Naartunermi, erninermi meeravissartaarnermilu sulinnigiffeqartarneq il.il. ullormusiaqartarnerlu pillugit Inatsisartut peqqussutaata allanngortinneqarneranik Inatsisartut peqqussutaat nr. 6, 11. november 2000-imeersoq kiisalu Naartunermi, erninermi meeravissartaarnermilu sulinnigiffeqartarneq il.il. ullormusiaqartarnerlu pillugit Inatsisartut peqqussutaata allanngortinneqarneranik Inatsisartut peqqussutaat nr. 1, 27. marts 2006-imeersoq.